

精校
大字
漢魏叢書九十六種

上海大通書局發行
武進唐鉅署

華陽國志目錄

巴志

漢中志

蜀志

南中志

公孫述劉二牧志

劉先主志

劉後主志

大同志

李特雄期壽勢志

漢中士女志

梓潼士女志

西州後賢志

序志

序志後語

附江

原士女志

華陽國志引

先王之制自二十五家之間書其恭敏任恤等而上之或曰書其學行或歲考其道德故民之賢能衰惡其吏無不與知之者焉漢魏以還井地廢而王政闕然猶時有所考察旌勸而州郡中正之職尚修於郡國鄉閭士女之行多見於史官隋唐急事緩政此制遂廢而不舉潛德隱行非野史紀述則悉無見於時民日益漓俗日益卑此有志之士所為歎惜也晉常璩作華陽國志於一方人物丁甯反覆如恐有遺雖蠻髦之民井臼之婦苟有可紀皆著於書且云得之陳壽所為耆舊傳按壽嘗為郡中正故能著述若此之詳自先漢至晉初踰四百歲士女可書者四百人亦可謂眾矣復至晉初至于周顯德僅七百歲而史所紀者無幾人忠魂義骨與塵埃野馬同沒於邱原者益亦多矣豈不重可歎惜哉此書雖繁富不及承祚之精微然議論忠篤樂道人之善蜀記之可觀未有過於此者鏤行於世庶有益於風教云宋元豐戊申秋日呂大守防微仲譔

巴志

晉常璩著

萬載袁廷鼂校

皆在唐堯洪水滔天鯀功無成聖禹嗣興導江疏河百川蠲脩封殖天下因古九圍以置九州仰稟參伐俯壤華陽黑水江漢為梁州厥土青黎厥田惟下上厥賦惟下中厥貢璆璆銀鏤砮磬熊羆狐狸織皮於是四奧既宅九州道同六府孔脩庶土交正底眷財賦成貢中國益時雍之化東被西漸矣歷夏殷周九州牧伯率職周文為伯西有九國

及武王克商并徐合青省梁合雍而職方氏猶掌其地辨其土壤甄其實利迄於秦帝漢興高祖籍之成業乃改雍曰涼革梁曰益故巴漢屬蜀屬益州至魏咸熙元年平蜀始分益州巴漢七郡置梁州治漢中以相國參軍中山耿黼為刺史元康六年廣漢益州更割雍州之武都陰平荊州之新城上庸魏興以屬焉凡統郡一十一縣五十八洛書曰人皇始出繼地皇之後兄弟九人分理九州為九圓人皇居中州制八輔華陽之壤梁岷之域是其一圓圓中之國則巴蜀矣其分野輿鬼東井其君上世未聞五帝以來黃帝高陽之支庶世為侯伯及禹治水命州巴蜀以屬梁州禹娶於塗山辛壬癸甲而去生子啟呱呱啼不及視三過其門而不入室務在救時今江州塗山是也帝禹之廟銘存焉會諸侯於會稽執玉帛者萬國巴蜀往焉周武王伐紂實得巴蜀之師著乎尚書巴師勇銳歌舞以凌殷人倒戈故世稱之曰武王伐紂前歌後舞也武王既克殷以其寵姬封於巴爵之以子古者遠國雖大爵不過子故吳楚及巴皆曰子其地東至魚復西至獬道北接漢中南極黔涪土植五穀牲具六畜桑蠶麻紵魚鹽銅鐵丹漆茶蜜靈龜巨犀山雞白雉苗潤鮮粉皆納貢之其果實之珍者樹有荔枝蔓有辛蒟園有芳蒟香茗給客橙葵其藥物之異者有巴戟天椒竹木之殯者有桃支靈壽其名山有塗籍靈臺石書刊山其名質真好義土風敦厚有先民之流故其詩曰川崖惟平其稼多黍旨酒嘉穀可以養父野惟阜邱彼稷多有嘉穀旨酒可以養母共祭祀之詩曰惟月孟春擷祭彼崖永言孝思享祀孔嘉彼黍既潔彼儀惟澤蒸命良辰祖考來格其好古樂道之詩曰日月明明亦惟其民誰能長生不朽難獲又曰惟德實寶富貴何常我思古人令問令望而其失在於重遲魯鈍俗素樸無造次辨麗之氣其屬有濮賓宜共奴獺夷蜺之蠻周之仲世雖奉王職與秦楚鄧為比春秋魯桓公九年巴子使韓服告楚請與鄧為好楚子使道胡將巴客聘鄧鄧南鄙攻而奪其幣巴子怒伐鄧敗之且後巴師楚師伐申楚子驚巴師魯莊公十八年巴伐楚克之魯文公十六年巴與秦楚共滅庸哀公十八年巴人伐楚敗於鄢地後楚主夏盟秦擅西土巴國分遠故於盟會希與戰國時嘗與楚婚及七國稱王巴亦稱王周之季世巴國有亂將軍有蔓

子請師於楚許以三城楚王救巴巴國既甯楚師請城蔓子曰藉楚之靈克弭禍難誠許楚王城將吾頭往謝之城
不可得也乃自刎以頭授楚使王歎曰使吾得臣若巴蔓子用城何為乃以上卿禮葬其頭巴國葬其身亦以上卿
禮周顯王時楚國衰弱秦惠文王與巴蜀為好蜀王弟苴私親於巴巴蜀世戰爭周慎王五年蜀王伐苴侯苴侯奔
巴巴為求救於秦秦惠文王遣張儀司馬錯救苴巴遂伐蜀滅之儀貪巴苴之富因取巴執王以歸置巴蜀及漢中
郡分其地為二縣儀城江州司馬錯自巴涪水取楚商於地為黔中郡秦昭襄王時白虎為害自秦蜀巴漢患之
秦王乃重募國中有能然虎者邑萬家金帛稱之於是夷胸忍廖仲樂何射虎秦精等乃作白竹弩於高樓上射虎
中頭三節白虎常從羣虎瞋恚盡搏然羣虎大响而死秦王嘉之白虎歷四郡害千二百人一朝患除功莫大焉欲
如要王嫌其夷人乃刻石為盟要復夷人頃田不租十妻不害傷人者論然人顧死佚錢從蠻夷贈罪貨盟曰秦犯夷輸黃
龍一雙夷犯秦輸清酒一鍾夷人安之漢興亦從高祖定秦有功高祖因復之專以射白虎為事戶歲出賣錢口四
十故世號白虎復夷一曰板楯蠻今所謂弱頭虎子者也漢高帝滅秦為漢王王巴蜀閬中人范目有恩信方畧知
帝必定天下說帝為募發實民要與共定秦秦地既定封目為長安建章鄉侯帝將討關東實民皆思歸帝嘉其
功而難傷其意遂聽還巴謂目曰富貴不歸故鄉如衣繡夜行耳徙封閬中慈鄉侯目固辭乃封渡沔縣侯故世謂
三秦亡范三侯也目復除民羅朴督鄧度夕襲七姓不供租賦閬中有渝水實民多居水左右天性勁勇初為漢前
鋒陷陣銳氣喜舞帝善之曰此武王伐紂之歌也乃令樂人習學之今所謂巴渝舞也天下既定高帝乃分巴置廣
漢郡孝武帝又兩割置犍為郡故世曰分巴割蜀以成犍廣也自時厥後五教雍和茂秀挺逸英偉既多而風謠旁
作故朝廷有忠貞盡節之臣鄉黨有主文歌詠之音巴郡譙君黃仕成哀之世為諫議大夫數進忠言後違避王莽
又不事公孫述述怒遣使齎藥酒以懼之君黃笑曰吾不省藥乎其子瑛納錢八百萬得免國人作詩曰肅肅清節
士執德實固貞違惡以授命沒世遺令聲巴郡陳紀山為漢司隸校尉嚴明正直西虜獻眩王庭試之分公卿以為

嬉紀山獨不視京師稱之巴人歌曰築室載直梁國人以貞其邪娛不揚目枉行不動身姦軌僻乎遠理義協乎民
巴郡嚴王思為揚州刺史惠愛在民毋當遣官吏塞路攀轅詔遂留之居官十八年卒百姓若喪考妣義送者齊
錢百萬欲以贍王思家其子徐州刺史不受送更義崇不忍持還乃散以為食食行客巴郡太守汝南應李先善而
美之乃作詩曰乘彼西漢漣漣其淵君子愷悌作民二親沒世遺愛式鏡後人漢安帝時巴郡太守連失道國人風
之曰明明上天下土是觀帝選元后求定民安孰可不念禍福由人願君奉詔惟德日親永初中廣漢漢中羌反虐
及巴郡有焉妙祈妻義王元憤妻姬趙蔓君妻華夙喪夫執共妻之節守一醮之禮號曰三貞遭亂兵迫匿懼見拘
辱三人同時自沈於西漢水而沒死有黃鳥鳴其亡處徘徊焉國人傷之乃作詩曰關關黃鳥爰集于樹窈窕淑女
是繡是黼惟彼繡黼其心匪石嗟爾臨川邈不可獲永建中泰山吳資元約為郡守屢獲豐年民歌之曰習習晨
風動樹雨潤乎苗我后郵時務我民以優饒及資運去民人思慕又曰望遠忽不見惆悵嘗佐何思澤實難忘悠悠
心永懷孝桓帝時河南李盛仲和為郡守貪財重賦國人刺之曰狗吠何諠諠有吏來在門披衣出門應府記欲得
錢語窮乞請期吏怒反見尤旋步顧家中家無可與思往從鄰貸鄰人以言置錢錢何難得令我獨憔悴漢末政
衰牧守自擅民人思治作詩曰混混獨沼魚習習激清流溫溫亂國民業業仰前脩其德操仁義文學政幹若洛下
閎任文公馮鴻卿龐宣孟文和趙溫柔龔升侯楊文義等播名立事言行表世者不勝枚載者也孝安帝元初三
年梁州羌反入漢中殺太守董炳擾動巴中中郎將尹就討之不克益州諸郡皆起兵禦之三府舉廣漢王堂為巴
郡太守撥亂致治進賢達士貢孝子嚴永隱士黃錯名儒陳髦俊士張瑞皆至大位益州刺史張喬表其尤異徙石
扶風民為立祠孝桓帝以并州刺史秦山但望子伯闔為巴郡太守勲郵民隱郡文學掾宕渠趙岑宏農馮允墊江
龔榮王祈李溫臨江嚴就胡良文愷安漢陳禧閬中黃闔江州毋成陽譽喬就張紹年存平直等詣望自訟曰郡境
廣遠千里給吏兼將人從冬往夏還夏單冬複惟踰時之役懷怨曠之思其昏喪吉凶不得相見解緩補綻下至新

菜之物無不躬買於市富者財德自供貧者無以自久是以清儉天枉不聞加以水陸艱難山有猛獸思迫期會隕身江河投死虎口咨嗟之難歷世所苦天之應感乃遭明府欲為更新童兒匹婦懼喜相賀將去遠就近釋危蒙安縣無數十民無遠近恩如未生澤及來世魏魏之功勒於金石乞以文書付計椽吏人鬼同符必獲嘉報等幸甚望深納之郡戶曹史枳白望曰等前後百餘人歷政訟訴未蒙感悟明府運機布政稽當宣極為民庶請命救患德合天地澤潤河海開闢以來今遇慈父經曰奕奕梁山惟禹甸之有倬其道韓侯受命比隆等盛於斯為美永興二年三月甲午望上疏曰謹按巴郡圖經境界南北四千東西五千周萬餘里屬縣十四鹽鐵五官各有丞史戶四十六萬四千七百八十口百八十七萬五千五百三十五遠縣去郡千二百至千五百里鄉亭去縣或三四百或及千里土界遐遠令尉不能窮詰姦凶時有賊發督郵追案十日乃到賊已速逃蹤跡絕滅罪逮捕證驗文書詰訊即從春至冬不能究訖繩憲未加或遇德令是以賊盜公行奸宄不絕榮等及隴西太守馮舍上谷太守陳宏說往者至有劫閭中令楊殷終津侯美吳傷尉蘇鴻彭亭侯孫魯雍亭侯陳已殷侯樂普又有女服賊千有餘人布散千里不即發覺謀成乃誅其水陸覆害然郡椽枳謝盛塞威張御魚復令尹尋主簿胡直若此非一給吏休謁往還數千閉囚須報或有彈劾動便歷年吏坐踰科恐失冬節侵疑先死如當移傳不能待報輒自刑戮或長吏忿怒冤枉弱民欲赴訴郡官每憚還往太守行桑農不到四縣刺史行部不到十縣郡治江州時有溫風遙縣客更多有疾病地勢剛險皆重屋累居數有火害又不相容結舫水居五百餘家承三江之會夏水漲盛壞散顛溺死者無數而江州以東濱江山險其人半楚安態敦重墊江以西土地平敞精敏輕疾上下殊俗情性不同散欲分為二郡一治臨江一治安漢各有桑麻丹漆布帛魚池鹽鐵足相供給兩近京師榮等自欲義出財帛造立府寺不費縣官得百姓懽心孝武以來亦分吳蜀諸郡聖德廣被民物滋繁增置郡土釋民之勞誠聖王之盛業也臣雖貪大郡以自優暇不忍小民顛蹶蔽隔謹具以聞朝議未許遂不分郡分郡之議始於是矣順桓之世板楯數反太守蜀郡趙溫恩信

降服於是宕渠出九德之禾胸忍有連理之木光和二年板楯復叛攻害三蜀漢中州郡連年苦之天子欲大出軍時征役疲弊問益州計曹考以方畧益州計曹椽程包對曰板楯七姓以射白虎為業立功先漢本為義民復除徭役但出實錢口歲四十其人勇敢能戰昔羌數入漢中郡縣破壞不絕若緣後得板楯來虜彌盡號為神兵羌人畏

忌傳語種輩勿復南行後建甯

後漢作建和

二年羌復入漢牧守遑遑復賴板楯破之若微板楯則蜀漢之民為左衽矣

前車騎將軍馮緄南征雖授丹楊精兵亦倚板楯近益州之亂朱鮪以并涼勤卒討之無功太守李顒以板楯平之忠功如此本無惡心長吏鄉亭更賦至重僕役過於奴婢華楚降於囚虜至乃嫁妻鬻子或自剄割陳寃州郡牧守不理去闕庭遙遠不能自聞含怨呼天叩心窮谷愁於賦役困乎刑酷邑域相聚以致叛戾非有深謀至計偕號不軌但選明能牧守益其資穀安便賞募從其利隙自然安集不煩征伐也昔中即將尹就伐羌擾動益部百姓諺云虜來尚可尹將殺我就徵還後美自破退如臣愚見權之遣軍不如任之州郡天子從之遣太守曹諫宣詔降赦一朝清戢獻帝初平元年征東中即將安漢趙穎建議分巴為二郡穎欲得巴舊名故曰益州牧劉璋以墊江以上為巴郡江南龐羲為太守治安漢以江州至臨江為永甯郡胸刃至魚復為固陵郡巴遂分安建安六年魚復塞眉白璋爭巴名璋乃改永甯為巴郡以固陵為巴東徙羲為巴西太守是為三巴於是涪陵謝本白璋求以丹興漢髮二縣為郡初以為巴東屬國後遂為涪陵郡分後屬縣七戶二萬去洛三千七百八十五里東接胸忍西接將縣南接涪陵北接安德漢陽

巴子時雖都江州或治墊江或治平都後治閬中其先王陵墓多在枳其畜牧在沮令東突破下畜沮是也又立市於龜亭北岸今新市里是也其郡東枳有明月碇廣德嶼故巴亦有三碇巴楚數相攻伐故置枳關陽關及沔關漢中郡治江州巴水北有柑橘官今北府城是也後乃遷南城劉先主初以江夏費瓊為太守領江州都督後都護李嚴更城大城周迴十六里欲穿城後山自汶江通水入巴江使城為州求以五都置巴州丞相諸葛亮不許亮將

北征召嚴漢中故穿山不連然造蒼龍白虎門別郡縣倉皆有城嚴子豐代為都督出解後梓潼李福為都督延熙中車騎將軍鄧芝為都督治陽關十七年省平郡樂城常安咸熙元年但四縣以鎮西安軍隴西怡恩和為太守二部守軍 江州縣郡治塗山有禹王祠及塗后祠北水有銘書詞云漢初據為張君為太守忽得仙道從此升度今民曰張府君祠縣下有清水穴巴人以此水為粉則膏暉鮮芳貢粉京師因名粉水故世謂江州墮林粉也有荔芰園至熟二千石常設厨膳命士大夫共會樹下食之縣北有稻田出御米陂池出蒲葦蘭席其冠族有波鈇母謝然溢楊白上官程常世有大官也 枳縣郡東四百里治涪陵水會土地确瘠時多人士有章常連黎牟楊郡冠首也臨江縣枳東西百里接胸忍有鹽官在監除二溪一郡所仰其豪門亦家有鹽井又嚴甘文楊杜為大姓晉初文立實作常伯納言左右楊宗符稱武隆人在吳為孫氏虎臣也 平都縣蜀延熙時省大姓殷呂蔡氏 墊江縣郡西北中水四百里有桑蠶牛馬漢時龔榮以後才為荊州刺史後有龔楊趙敏令德為巴郡太守淳于長甯雅有美貌黎夏杜皆大姓也 樂城縣在酉州江三百里延熙十七年省常安縣亦省

巴東郡先主入益州改為江關都尉建安二十一年以胸忍魚復羊渠

按晉志巴東縣有羊渠

及宜都之巫北井六縣為固陵郡

武陵康立為太守章武元年胸忍徐慮魚復襄機以失巴名上表自訟先主聽復為巴東南郡輔匡為太守先主征

吳於夷道還薨斯郡以尚書令李嚴為都督造設圍戍嚴還江州征西將軍汝南陳到為都督到卒官以征北大將

軍南陽宗預為都督預還內領軍襄陽羅默為代蜀平獻仍其任拜凌江將軍領武陵太守泰始二年吳大將步闡

唐咨攻歎獻保城咨西侵至胸忍故蜀尚書郎巴郡楊宗告急于洛未還獻出擊闡大破之闡咨退獻還監軍假節

安南將軍封西鄂侯入朝加錫御蓋朝服吳武陵太守孫恢寇南浦安蠻護軍楊宗計之退走因表以宗為武陵太

守住南浦誘鄧武陵蠻夷行三縣初附民獻卒以捷為太守天水楊攸為監軍攸還梁州刺史朝議以唐彬及宗為

代晉武帝問散騎常侍文立曰彬宗孰可用立對曰彬宗俱立事績在西不可失者然宗才誠佳有酒嗜彬亦其人

性在財欲惟陛下裁之帝曰財欲可足酒嗜難改遂用彬為監軍加廣武將軍迄吳平巴東後省羊渠置勸浦晉太康初將巫北井還建平但五縣去洛二千五百里東接建平南接武陵西接巴郡北接房陵奴獫夷蠻之蠻民魚復縣郡治公孫述更名白帝章武二年改曰永安咸熙初復有橘官又有澤水神天旱鳴鼓於傍即雨也 朐忍縣郡西二百九十里水道有東陽下瞿數灘山有大小石城並靈書木鹽井靈龜咸熙元年獻靈龜於相府大姓扶先徐氏漢時有扶徐荊州着石楚訪有弱頭白虎復夷者也着石楚訪四字未詳 弱其雨切又翹移切 弼強貌又渠黝切又渠良切文一重音三 漢豐縣建安二十一年置在郡西北彭溪源 南浦縣郡南三百里晉初置主夷郡郡與楚接人多勁勇少文學有將帥材

涪陵郡巴之南鄙從枳南入折丹涪水本與楚商於之地接秦將司馬錯由之取楚商於地為黔中郡也後恆有都尉守之舊屬縣五去洛五千一百七十里東接巴東南接武陵西接牂柯北接巴郡土地山險水灘人多慧勇多獫蠻之民縣邑阿黨鬪訟必死無蠶桑少文學惟出茶丹漆蜜臘漢時亦甲軍常取其民蜀丞相亮亦發其勁卒三千人為連弩士遂移家漢中延熙十三年大姓徐巨反車騎將軍鄧芝討平之見元猿綠其山芝性好弩手自射援中之猿子拔其箭卷木葉塞其創芝嘆曰嘻吾傷物之性其將死矣乃移其豪徐蘭謝范五十家於蜀為獵射官分羸弱配督將韓符名為助郡軍遂世掌部曲為大姓晉初移弩士于馮翊蓮勺其人性質直雖徙他所風俗不變故迄今有蜀漢關中涪陵其為軍在南方者猶存山有大龜其甲可卜其緣可作义世號靈义出涪陵縣郡治 丹興縣蜀時省山出名丹 漢平縣延熙十三年置 萬富縣孝靈帝時置本名永富 漢髮縣有鹽井諸縣北有獫蠻又有蟾夷也

巴西郡屬縣七去洛二千八百一十五里東接巴郡南接梓潼北接涪西城土地山原多平有牛馬桑蠶其人自先漢以來僊偉倣儻冠冕三巴及郡分後叔布榮始周群父子程公宏等或學兼三才或精秀奇逸其次馬盛衡承伯才藻清妙龔德緒兄弟英氣嗟然黃公衡應權通變馬德信王子均勾孝興張伯岐建功立事劉二主之世稱美荆楚

乃先漢以來馮車騎范鎮南皆植斯鄉故曰巴有將蜀有相也及晉譙侯修文於前陳君煥炳於後並遷雙固俾群
類世甄在傳記縉紳之徒不勝次載焉 閬中縣郡治有彭池大澤名山靈臺見文緯書識大姓有三狐五馬蒲趙
任黃嚴也 南充國縣和帝時置有鹽井大姓侯譙氏 安漢縣號出人士大姓陳范閻趙 平州縣其二縣為郡
宕渠郡延熙中置以廣漢王士為太守郡建九年省永興元年李雄復置今遂為郡長老言宕渠蓋為故實國今有
寶城盧城秦始皇時有長人二十五丈見宕渠秦史胡母敬曰是後五百年外必有異人為大人者及雄之王祖世
出自宕渠有識者皆以為應之先漢以來士女賢貞縣民車騎將軍馮緄大司農元賀大鴻臚龐雄桂陽太守李溫
等皆建功立事有補於世緄溫各塋所在常以三月二子之靈還鄉里水蟲漲郡縣吏民莫不於水上祭之其列女
節義在先賢志 宕渠縣郡治有鐵官石蜜山圖所採也 漢昌縣和帝時置大姓勾氏 宣漢縣今省 右巴國
分為五郡二十三縣

謬曰巴國遠世則黃炎之支封在周則宗姬之戚親故於春秋班倅秦楚示甸衛也若蔓子之忠烈范目之果毅風
淳俗厚世挺名將斯乃江漢之含靈山岳之精爽乎觀其俗足以知其敦一矣昔紗麗廟卜偃言其後當有聖女興
元城郭公謂王翁孺屬當其時故有政君李雄宕渠之廝伍略陽之黔首耳起自流隸君獲士民其長人之魄良有
以也

漢中志

晉常璩著

漢中郡本附庸國屬周赧王二年秦惠文王置郡因水名也漢有二源東源出武都氏道漾山因名漾禹貢流漾
為漢是也西源出隴西嶓冢山會白水經葭萌入漢始源曰沔故曰漢沔在詩曰滔滔江漢南國之紀其應上昭于
天又曰惟天有漢其分野與巴蜀同占其地東接南郡南接廣漢西接隴西陰平北接秦川厥壤沃美賦貢所出

畧牟三蜀六國時楚強盛畧有其地後為秦恆成爭地漢高帝既克秦獲子嬰項羽封高帝為漢王王巴蜀三十一縣帝不悅丞相蕭何謀曰雖王漢中之惡不猶愈於死乎且語曰天漢其稱其美夫能屈於一人之下則伸於萬乘之上者湯武是也願大王王漢中撫其民以致賢人收用巴蜀還定三秦天下可圖也帝從之都南鄭及項籍弑義帝高帝東伐蕭何常居守漢中足食足兵既定三秦蕭何鎮關中資其眾卒平天下以田叔為漢中守屬縣十二去洛一千九十一里叔既饋以軍饌又致名材立宮室帝嘉之後為魯相然以帝業所興不封藩王自叔之後世修文教有倣儻之士異人並挺鄧公抗言於孝景之朝以明忠枉之情張敖持以蒙險遠為孝武帝開緣邊之地賓沙越之國致大宛之馬入南海之衆而車渠瑪瑙珊瑚琳碧劇寶明珠玳瑁琥珀水晶琉璃火浣之布蒲桃之酒筇竹茹醬殊方奇玩盈於市朝振揚威靈被於幽裔遂登九列杖節繡衣剖符博望谷口子真秉箕穎之操湛然岳立不營不求德聲萬流楊王孫應至人之概自建武以後羣儒修業開按圖緯漢之宰相當出坤鄉於是司徒李公屢登七政太傅子堅奕世論道其珪璋珊瑚之器則陳伯臺李季子申伯之徒文秀瑋晤其州牧郡守冠蓋相繼於西州為盛益濟濟焉莽時公孫述据蜀跨有漢中當秦隴之徑每罹其害安帝永初二年陰平武都羌反入漢中殺太守董炳沒畧吏民四年羌復來太守鄭廙出屯褒中欲與羌戰主簿段崇陳禪以為但可堅守來虜乘勝其鋒不可當廙不從戰敗績崇與門下吏王宗原展及崇子勅兄子伯生力戰捍廙并命功曹程信素居守馳來赴難冒寇殲殲虜遂大盛天子乃拜巴郡陳禪為漢中太守虜素憚禪更來盤結禪知攻守未可卒下而年荒民困乃矯詔赦之大小咸服既誅其亂首天子善之徙禪左馮翊太守程信怨耻乃結故吏冠蓋子弟嚴孽李容姜濟陳已曹康勾矩劉旌等二十五人誓志報羌各募壯士豫結同死以待寇太守鄧成命信為五官掾等門下官屬元和二年羌復來巴郡板楯救之信等將其士卒力奮討大破之信被八創二十五人戰死自是後羌不敢南向五年天子下詔褒數信崇等賜其家穀各千斛宗展孽等家穀各五百斛列畫東觀每新太守到必先存問其家以羌畏

服陳禪拜禪子澄漢中太守漢末沛國張陵學道於蜀鶴鳴山造作道書自稱太清元元以惑百姓陵死子衡傳其業衡死子魯傳其業魯字公祺以鬼道見信於益州牧劉焉魯母有少容往來焉家初平中以魯為督義司馬往漢中斷谷道魯既至行寬惠以鬼道教立義舍置義米義肉其中行者取之量腹而已不得過多云鬼病之其市肆賈平亦然犯法者三原而後行刑學道未信者謂之鬼卒後乃謂祭酒巴漢夷民多使之其供通限出五斛米故世謂之米道扶風蘇固為漢中太守魯遣其黨張修攻固城固人陳調素遊俠學兵法固以為門下據說固守杆禦寇之術固不能用踰牆走投南鄭趙嵩嵩將俱逃賊盛固遣嵩求隱避處嵩不還固又令鈴下偵賊賊得鈴下遂得殺固嵩痛憤仗劍直入調亦聚其賓客百餘人攻修戰死魯遂有漢中數害漢使焉上書言米賊斷道至劉焉子璋為牧時魯益驕恣璋怒連安五年殺魯母弟魯率巴夷杜濩朴胡袁約等叛為讐敵魯時使使漢朝亦慢驕帝室以亂不能征就拜中郎將漢甯太守不置長吏皆以祭酒為治民璋數遣龐羲李思等討之不能克而巴夷日叛乃以羲為巴西太守又遣楊懷高沛守關頭請劉先主討魯先主更襲取璋二十年魏武帝西征魯魯走巴中先主將迎之而魯功曹巴西閭閻說魯北降歸魏武贊以大事宜附託不然西結劉備以歸之魯勃然曰甯為曹公作奴不為劉備上客遂委質魏武魏武拜魯鎮南將軍封義平侯又封其五子皆列侯時先主東下江安巴漢稽服魏武以巴夷王杜濩朴胡袁約為三巴太守留征西將軍夏侯淵及張郃益州刺史趙雲等守漢中遷其民於關隴二十四年春先主進軍攻漢中至定軍山淵顯來戰大為先主所破將軍黃忠斬淵顯首魏武帝復西征先主先主曰孟德雖來無能為也我必有漢川矣先主遂為漢中王將還成都當得重將以鎮漢中眾皆以必張飛張飛心亦自許先主乃以牙門義陽魏延為鎮遠將軍漢中太守先主大會群臣問延曰今委卿以漢中卿居之若何對曰若曹操舉天下而來請為大王拒之若偏將十萬而來請為大王吞之眾壯其言初魏武之留淵郃也以難筋示外人莫察惟主簿楊修知之故曰夫雞肋棄之如可惜食之無所得以比漢中也是後處蜀魏界固險重

守自丞相大司馬大將軍皆鎮漢中蜀平梁州治沔陽

大康中晉武帝子漢王迪受封更曰漢國郡但六縣 南鄭縣郡治周貞王十六年秦厲公城之有池水從旱山來

入沔大姓李鄭趙氏 沔陽縣州治有鐵官又有度水水有二源一曰清檢二曰濁檢有魚穴清水出鱖濁水出鮓

常以二月八月取蜀丞相諸葛亮墓定軍山 褒中縣孝昭帝元鳳六年置本都尉治也山名扶水有唐公房祠

也 城固縣蜀時以沔陽為漢城城固為樂城 蒲池縣 西鄉縣

魏興郡本漢中西城縣哀平之世縣民錫光字長冲為交州刺史徙交趾太守王莽篡位拒郡不附莽方有事海內

未以為意尋值所在兵起遂自守更始即位 正其本宮世祖嘉其忠節徵拜為大將軍朝侯祭酒封鹽水侯後漢

中數寇亂縣土獨存漢季世別為郡建安二十四年劉先主命宜都太守孟達從秭歸北伐房陵上庸自漢中又

遣副軍中郎將劉封乘沔水會達上庸以申耽弟儀為建信將軍西城太守達耽降魏黃初二年文帝轉儀為魏興

太守封鄖鄉侯蜀平遂治西城屬縣六戶萬去洛一千七百里土地險隘其人半楚風俗畧與荊州沔中郡同 西

城縣郡治元康元年封越騎校尉蜀郡何攀為國公也 錫縣 安康縣 興晉縣晉置 鄖鄉縣本名長利縣

縣有鄖鄉 洵陽縣洵水所出

上庸郡故庸國楚與巴秦所共滅者也秦時屬蜀後屬漢中漢末為上庸郡建安二十四年孟達劉封征上庸上庸

太守申耽稽服遣子弟及宗族詣成都先主拜耽征北將軍封鄖鄉侯仍郡如故黃初中降魏魏文帝拜耽懷集將

軍徙居南陽省上庸并新城孟達誅後復為郡屬縣五戶七千去洛一千七百里

上庸縣郡治 北巫縣 安樂縣咸熙元年為公國封劉後主也 武陵縣 安富縣 微陽縣

晉書上庸郡有土廉無安樂

新城郡本漢中房陵縣也秦始皇徙呂不韋舍人萬家於房陵以其隘地也漢時宗族大臣有罪亦多徙此縣漢末

以為房陵郡建安二十四年孟達征房陵殺太守蒯祺進平三郡興劉封不和封奪達鼓吹關羽圍樊城求助於封

達封達以新據山郡未可擾動為辭羽為吳所破殺達既忍封又懼先主見責遂拜書先主告叛降魏文帝善達姿才容貌以為散騎常侍建武將軍襲劉封封敗走達據房陵文帝合三郡為新城以達為太守後蜀丞相諸葛亮將北伐招達為外援故貽書曰嗟乎孟子度邇者劉封侵凌足下以傷先帝待士之望慨然永歎每存足下平素之志豈虛托名載策者哉都護李嚴亦與書曰吾與孔明並受遺詔思得良伴吳王孫權亦招之達遂背魏通吳蜀表請馬督於文帝撫軍司馬宣王以為不可許帝曰吾為天下主義不先負人當使吳蜀知吾心乃多與之過

其所求明帝太和初達叛魏歸蜀時宣王屯宛知其情乃以書喻之曰將軍昔棄劉備託身國家委將軍以疆場之任任將軍以圖蜀之事可謂心貫白日蜀人愚智莫不切齒於將軍諸葛亮欲相破惟苦無路耳模之所言郭模亮達詐降

洩孟達謀者非小事也亮豈輕之而令宣露此殆易知耳達乃以書與亮曰宛去洛八百去此千二百里聞吾舉事當

表上天子比相反復一月間也則吾城已固諸軍足辦則吾所在深險司馬公必不自來諸將來吾無患矣及兵到

達又告亮曰吾起事八日而兵至城下何其神速也亮以其數反復亦不救遂為宣王所誅滅宣王分為三郡新城

屬縣四戶二萬去洛一千六百里房陵縣郡治有維山維水所出東入瀘瀘字疑誤當作漢志新城郡有維水所出亦云東入瀘

沔鄉縣昌魏縣緩陽縣石三郡漢中所分也在漢中之東故蜀漢謂之東三郡蜀時為魏屬荊州晉元康

六年始還梁州山水艱阻有黃金子午馬聰建鼓之阻又有作道九君搏土作人處而其記及漢中記不載又不為

李雄所據據識其大梗概未能詳其小委曲也

梓潼郡本廣漢屬縣也建安十八年劉先主自葭萌南攻州牧劉璋留中郎將南郡霍峻守葭萌城張魯遣將楊

帛誘峻求共守城峻曰小人頭可得城不可得也帛退劉璋將向存扶禁由巴閬水攻峻歲餘不能克峻眾才八百

人存眾萬計更為峻所破敗退走成都既定先主嘉峻功二十二年分廣漢置梓潼郡以峻為太守屬縣六戶萬

去洛二千八百三十八里東接巴西南接廣漢西接陰平北接漢中土地出金銀丹漆藥蜜也世有雋考人倖於巴

蜀梓潼縣郡治有五婦山故蜀五丁士所拽蛇崩山處也有善板祠一曰惡子民歲上雷杼十枚歲盡不復見云雷取去四姓文景雍鄧者也涪縣去成都三百五十里水通于巴為蜀東北之要蜀時大將軍鎮之有宕田本稻田屏水出屏山其源出金銀鑛洗取火融合之為金銀陽泉出石丹大司馬蔣琬葬此大姓楊杜李人士多見者舊傳也晉壽縣本段朗城劉氏更曰漢壽水通于巴西又入漢川有金銀鑛民今歲歲洗取之蜀亦大將軍鎮之漆樂蜜所出也大將軍費禕葬此山大姓葬此者多白水縣有關尉故州牧璋將楊懷高沛守也廣漢縣德陽縣有劍閣道三十里至陝有閬尉桑下兵民也

武都郡本廣漢西部都尉治也元鼎六年別為郡屬縣九戶萬去洛一千八百七十八里東接梓潼西接天水北接始平土地險阻有麻田氏僂多羌戎之民其人半秦多勇戇出名馬牛羊漆蜜有瞿堆百頃嶮勢氏僂常依之為叛漢世數征討之分徙其羌遠至酒泉燉煌其攻戰壘戍處所亦多建安二十四年先主遣將軍雷同吳蘭平之為魏將曹洪所破殺魏益州刺史天水楊阜治此郡阜以濱蜀境移其氏僂於汧雍及天水畧陽建興七年丞相諸葛亮遣護軍陳戒伐之遂平武都陰平二郡還屬益州魏將夏侯淵張郃徐晃征伐常由此郡而蜀丞相亮及魏延姜維等多從此出秦川遂荒無晉民其氏僂楊漢屬魏魏置其郡屬蜀平屬雍州太康六年還梁州八年氏僂齊萬年反郡罹其寇晉民流徙入蜀及梁州永嘉初天水氏僂楊茂搜率種人為寇保據其郡貢獻長安愍帝以胡寇方盛欲懷來戎翟拜驃騎將軍左賢王劉曜破長安丞相平昌公上隴據天水茂搜數饋平昌公拜茂搜長子難敵征南將軍少子堅頭龍驤將軍種衆強盛東破梁州南連李雄威服羌戎時平昌公為劉曜所破陳安作賊于時并氏僂如一國茂搜死敵堅代為主數歲曜自攻武都敵堅南奔雄至晉壽遣子為質又厚賂雄兄晉壽守將稚曜不獲敵堅引還武都恃嶮驕慢攻走雄陰平太守羅演演稚舅也稚念惠白兄含與雄求征之雄使含將稚數千人攻之時敵妻死葬于陰平含稚征至下辦入武街城以深入無繼盡為氏僂所破然敵堅死子磐殺復

代為主

樓下碑縣名有赤亭

咸康四年敵從弟初熬磐殺兄弟代為主迄今自茂搜父子之結據也通晉家及李雄劉曜石

勒石虎張駿皆稱臣奉貢受其官號所向用其官及其年號下辦縣郡治一曰武街武都縣東漢水所出有天地

澤一本云天地澤

上祿縣故道縣河池縣泉街水入沮合漢也沮縣河池水所出東狼谷也上祿故道二縣名俱屬武都郡平

樂縣脩成縣嘉陵縣

陰平郡本廣漢北部都尉永平後羌虜數反遂置為郡屬縣四戶萬去洛二千三百四十四里東接漢中南接梓潼

西接隴西北接酒泉土地山嶮人民剛勇多氏僂有黑白水羌紫羌胡虜風俗所出與武都郡畧同漢安帝永初二年

羌反燒郡城郡人退往白水會漢陽諸羌反溢入漢殺太守漢陽杜琦自稱將軍叛亂屠漢郡也段萌漢使御史

大夫唐喜討琦進討羌經年不下詔賜死更遣中郎將尹就討羌亦無功諸郡太守皆屯涪元初五年巴郡板楯軍

救漢中漢中大破羌羌乃退郡復治置助郡都尉劉先主之入漢中也爭二郡不得建興七年諸葛亮始命陳戒

平之魏亦遙置其郡屬雍州自景谷有步道徑江由左儋行出涪鄧艾從之伐蜀元康六年還屬梁州永嘉末太

守王暨相暴郡民毛深左騰等遂出之相率降李雄晉民盡出蜀氏羌為楊茂搜所占有一陰平縣郡治漢曰陰平

道也甸氏縣有白水山微外入漢平武縣有蘭尉自景谷有步道徑江由左儋出涪鄧艾伐蜀道也劉主時置

義守號關尉剛氏縣涪水所出有金銀鑛右梁州

誤曰漢沔彪炳靈光上照在天鑒為雲漢於地畫為梁州而皇劉應之洪祚攸長蕭公之云不亦宜乎

蜀志

晉常璩著

蜀之為國肇於人皇與巴同囿至黃帝為其子昌意娶蜀山氏之女生子高陽是為帝嚳封其支庶於蜀世為侯伯
歷夏商周武王伐紂蜀與焉其地東接于巴南接于越北與秦分西奄峨嵋地稱天府原曰華陽故其積靈則井

絡垂耀江漢導流河圖括地象曰岷山之下為井絡帝以會昌神以建福夏書曰岷山導江東別為沱泉源深盛為四瀆之首而分為九江其實則有璧王金銀珠碧銅鐵鉛錫赭堊錦繡麝犀象氈氍丹黃空青桑漆麻紵之饒滇獠賓獍僮僕六百之富其卦值坤故多斑綵文章其辰值未故尚滋味德在少昊故好辛香星應輿鬼故君子精敏小人鬼黠與秦同分故多悍勇在詩文王之化被乎江漢之域秦幽同詠故有夏聲也其山林澤漁園圃果瓜四時代熟靡不有焉有周之世限以秦巴雖奉王職不得與春秋盟會君長莫同書軌周失綱紀蜀先稱王有蜀侯蠶叢其目縱始稱王死作石棺石槨國人從之故俗以石棺槨為縱目人家也次王曰栢灌次王曰魚鳧魚鳧王田於前山忽得仙道蜀人思之為立祠後有王曰杜宇教民務農一號杜宇時朱提有梁氏女利遊江源宇悅之納以為妃移治郫邑或治瞿上七國稱王杜宇稱帝號曰望帝更名蒲卑自以功德高諸王乃以褒斜為前門熊耳靈關為後戶玉壘峨眉為城郭江潛綿洛為池澤以汶山為畜牧南中為園苑會有水災其相開明決玉壘山以除水害帝遂委以政事法堯舜禪授之義遂禪位于開明帝升西山隱焉時適二月子鵲鳥鳴故蜀人悲子鵲鳥鳴也巴亦化其教而力農務迄今巴蜀民農時先祀杜宇君開明位號曰叢帝叢帝生盧帝盧帝攻秦至雍生保子帝帝攻青衣雄張獠獍九世有開明帝始立宗廟以酒曰醴樂曰荆人尚赤帝稱王時蜀有五丁力士能移山舉萬鈞母王薨輒立大石長三丈重千鈞為墓志今石笋是也號曰笋里未有謠列但以五色為主故其廟稱青赤黑黃白帝也開明王自夢鄼移乃徙治成都周顯王之世蜀王有褒漢之地因獵谷中與秦惠王遇惠王以金一笥遺蜀王王報珍玩之物物化為土惠王怒群臣賀曰天承我矣王將得蜀土地惠王喜乃作石牛五頭朝瀉金其後曰牛便金有養卒百人蜀人悅之使使請石牛惠王許之乃遣五丁迎石牛牛既不便金怒遣還之乃嘲秦人曰東方牧犢兒秦人笑之曰吾雖牧犢當得蜀也武都有一丈夫化為女子美而艷蓋山精也蜀王納為妃不習水土欲去王必留之乃為東平之歌以樂之無幾物故蜀王哀之乃遣五丁之武都擔土為妃作冢蓋地數畝高七丈上有石鏡今成都